

Storia di un homber y un edificio

ORANJESTAD(AAN)- For di Sr. Clyde Harms DIARIO a ricibi copia di un articulo cu el a manda na Straatnamen Commissie cu un suplica na e comisie, pa conseha favorablemente sie edificio di loods worde baha abao pa yama e plaza cu ta keda "Plaza Maarten Noot", kende tabata Hoofd loods y Havenmeester di Oranjestad y tabata un persona cu a stima Aruba masha hopi mes.

Siguientemente DIARIO ta publica e e storia manera cu Sr. Harms a skirbie.

Esaki ta storia di un homber y un edificio. E homber tabata Maarten Noot. E edificio ta esun dilanti di Bali Restaurant, caminda e oficina di departamento di turismo tabata ubica recientemente.

Maarten Noot a bin Aruba na aña 1938 como Hoofd loods y Havenmeester di Oranjestad. E unico loods na Oranjestad! E tempo ey loodsdiens tabata ubica den un hokkie bieu ariba e waf chiquito.

Den su prome rapport pa gobierno colonial na Willemstad sr. Noot a pidi un edificio nobo caminda e y su hendenan por a worde ubica debidamente. Poco tempo despues guerra mundial a rementa na Europa y Sr. Noot mester a warda pa su edificio..

Durante e prome añanan di guerra, tempo cu e submarinonan Aleman tabata ataca e tankeronan petrolero dilanti di costa di Aruba, den dia of durante anochinan di black-out, Maarten Noot tabata sali bay compana e bapornan cu tabata drenta y sali waf di Oranjestad.

Hopi biaha durante anochinan scur y Sr. Noot mester a risca su bida saliendo cu boto di loods bay purba rescata tripulantenan di tankeronan cu a worde torpedea door di submarinonan Aleman.

E loodsboot tabata bolbe cu hombernan cu a worde saca for di lama cubri cu azeta na candel. Varios Arubiano y Antiyano a scapa di un morto cruel na lama danki na e esfuerzonan heroico di Sr. Noot. Y semper el a sigui anhele y lucha pa un lugar pa su departamento.

Por fin, tres aña despues cu Sr. Noot a manda su peticion e gobierno colonial a dicidi di construi un oficina pa loodsdiens. Sr. Noot tabata asina contento cu el a filma e construccin di e edificio.

Ironicamente, apenas Sr. Noot a muda den su edificio el a worde translada pa San Nicolas (Lago). Ayanan el a haya oficina den mas mal condicion cu el a haya na Playa. Atrobe el a pidi pa oficina nobo, pero e biaha aki e mester a warda seis aña!

Sr. Noot tabata un di e fundadornan di Aruba Rotary Club y como miembro di e organizacion aki el a sirbi e comunidad Arubano. El a forma hopi amistad na Aruba y e tabata tin cariño grandi pa esnan cu a traha cu ne, especialmente pa Neo Tromp y Miguel Odor, q.e.p.d.

Eventualmente Maarten Noot a bira Havenmeester di henter Aruba na aña 1952 y el a muda bek pa Oranjestad. Na aña 1954 sr. Noot a bay Hulanda cu pensioen. Apesar di tur locual el a haci pa Aruba, apesar di su hazañanan heroico durante guerra mundial, Sr. Noot nunca a worde honra oficialmente.

Pero dia cu el a sali di Aruba abordo di un bapor di Grace Line un flotilla di boto di piscadornan a compana te paford bahia, demostrando asina e cariño y aprecio cu e marinonan Arubiano tabata tin pe.

"Boes" Orman, e gran futbolista internacional y piscador ta corda cu e tambe a forma parti di e flotilla ey. Segun Boes, Sr. Noot tabata un gran amigo di tur e piscadornan.

Maarten Noot a muri mas di 15 aña pasa. Entre tanto loodsdiens a muda dos biaha, pero e edificio a keda y a worde uza door di Kamer van Koophandel y mas despues door di departamento di turismo.

Pa nos, amigonan di Sr. Noot, e edificio di loods a keda como un monumento na su memoria. Recientemente e unico yiu di Sr. Noot a bishita Aruba for di Australia caminda e ta biba, y el a trece pa biblioteca di Aruba hopi pelicula bieu cu su papa a traha na Aruba, algun di nan tin mas di 50 aña! Inclui den nan ta esun di e construccin di e edificio di loods.

Awor e edificio tambe su dianan ta conta ya cu e ta den caminda di "progreso". Aparentemente, pa duna e autonnan cu t sali for di e hotel nobo e posibilidad di lora y subi e brug cual ta worde lanta over di e canal cu ta bay te den lobby di e hotel, e edificio cu a sirbi pueblo mas di cuarenta y siete aña y cu ainda ta di masha hopi balor, mester worde sacrifica. Y asina lo yega na su final tambe e storia di un homber y un edificio.

Ta di spera cu esnan cu tin poder di salba e edificio lo por haya un manera di desvia e trafico di e hotel sin tin di derumba e edificio. Pero si esey ta absolutamente imposible, ta di spera cu e plaza cu lo keda despues cu e edificio worde tuma lo worde yama "Plaza Maarten Noot". Asina Aruba por fin lo honra un pionero di loodsdiens na Aruba, un homber cu a stima Aruba."